

Projek mega negeri: K'jaan Pulau Pinang lwn NGO
MalaysiaKini.com
March 8,2012
Susan Loone

Kerajaan Pulau Pinang menafikan dakwaan dua NGO bahawa ia gagal menyalurkan maklumat kepada orang ramai mengenai projek-projek mega yang dicadangkan di negeri itu - satu dakwaan yang disiarkan dalam media baru-baru ini.

NGO tersebut - Sahabat Alam Malaysia (SAM) dan Persatuan Pengguna Pulau Pinang (CAP) - kedua-duanya dipimpin aktivis veteran SM Mohamed Idris, mempersoalkan "ketelusan dan keterbukaan" kerajaan negeri, dengan mendakwa ia kurang mengadakan perbincangan awam berkaitan projek infrastruktur yang dirancang.

Tetapi Setiausaha Politik kepada Ketua Menteri, Mohd Zairil Khir (kiri) menyangkal dakwaan tersebut dengan berkata, kerajaan telah mendedahkan maklumat awam mengenai projek-projek tersebut, manakala bosnya, Lim Guan Eng telah menghadiri dua sesi perbincangan dengan wakil NGO dan pihak umum.

"Kami tidak mempertikaikan hakikat bahawa isu ketelusan dan keterbukaan merupakan keutamaan yang paling penting.

"Malah sebagai kerajaan yang berdasarkan prinsip CAT (Cekap, Akauntabel, Telus), kami telah mengambil pelbagai langkah untuk memaklumkan pihak umum mengenai projek-projek infrastruktur yang dicadangkan," kata Zairil dalam satu kenyataan hari ini.

Zairil merujuk khusus kepada sebuah artikel yang bertajuk "Kesal DAP tidak salur maklumat kepada rakyat", yang disiarkan dalam Utusan Malaysia pada 6 Mac.

Dalam laporan tersebut, SM Mohamed dilaporkan berasa kecewa dengan Kerajaan Negeri Pulau Pinang kerana tidak menyediakan maklumat lengkap kepada orang ramai berhubung projek infrastruktur yang dilaksanakan di negeri ini, yang bernilai berbilion ringgit.

Projek berkenaan termasuk terowong sepanjang 6.5km dari Gurney Drive ke Bagan Ajam, jalan sepanjang 12 km menghubungkan Tanjung Bungah dan Teluk Bahang, dan beberapa projek lain untuk mengurangkan kesesakan lalulintas di pulau itu.

Aktivis veteran menambah bahawa isu ketelusan dan keterbukaan yang berkaitan dengan projek adalah keutamaan yang paling penting dalam perancangan awal dan membuat keputusan sesuatu projek.

Projek jalan RM5-8 bilion

Zairil berkata, Pada 28 April 2011, satu sidang akhbar telah diadakan di Jabatan Perdana Menteri di Putrajaya mengenai penandatanganan Memorandum Persefahaman (MoU) di antara Kerajaan Negeri Pulau Pinang dan sebuah syarikat milik kerajaan China.

Menurutnya, kedua-dua Perdana Menteri - Datuk Seri Najib Tun Razak (Malaysia) dan Wen Jia Bao (China) - menyaksikan majlis menandatangani MoU tersebut

"Semua projek ini akan dijalankan secara tender terbuka. Kos dianggarkan di antara RM5-8 bilion untuk keempat-empat projek ini tetapi dijangka lebih rendah kerana ia dijalankan dengan tender terbuka," kata Zairil.

Menurutnya lagi, pemeteraian MoU itu diikuti dengan satu sidang akhbar yang diadakan di Dewan Undangan Negeri pada 29 April tahun lepas untuk meminta pandangan rakyat terhadap empat projek

infrastruktur tersebut.

Dalam sidang DUN pada 10 Mei 2011, Ketua Menteri telah sekali lagi menjawab soalan-soalan mengenai projek-projek infrastruktur tersebut, tambahannya.

Zairil berkata, kerajaan negeri dan juga MPPP telah menerima beberapa pandangan dan cadangan sejak 29 April, manakala Ketua Menteri telah mengadakan sesi perjumpaan dan perbincangan dengan beberapa wakil NGO dan pihak umum, termasuk dengan Penang Forum pada 16 Oktober 2011 dan juga pada 19 November 2011.

"Dalam kedua-dua forum tersebut, SM Mohamed telah dijemput tetapi beliau tidak dapat hadir dan telah menghantarkan wakil CAP.

"Oleh itu, adalah mengejutkan bagaimana CAP boleh menyatakan bahawa tidak ada rundingan dengan NGO atau rakyat apabila begitu banyak ruang diberikan untuk membincangkan isu-isu berkaitan dengan projek-projek infrastruktur tersebut.

"Mengikut senarai kehadiran, kami boleh mengesahkan bahawa wakil CAP iaitu Rudhrapathy Vijayala (Ravi) telah menghadiri kedua-dua sesi tersebut," tambahannya.

Ketika dihubungi Rudhrapathy berkata pertemuan wakil NGO dengan Ketua Menteri tidak dianggap sebagai "perundingan awam".

Perundingan awam termasuk memaparkan pelan dan maklumat mengenai projek-projek negeri, contohnya, orang ramai dijemput untuk mencadangkan rancangan mereka untuk Taman Botani Pulau Pinang di tingkat 3, Komtar.

"Ya, kita bertemu dua kali dengan beliau tetapi ini hanyalah satu perjumpaan antara NGO dan kerajaan negeri, ianya bukan perundingan awam," katanya kepada Malaysiakini.

"Dalam satu pertemuan NGO dengan KM, kami menyampaikan pandangan dan rungutan kami dan beliau menerang dan menjelaskan pandangannya," katanya.

Radhrapathy berkata wakil-wakil NGO - semasa pertemuan tersebut - tidak pernah ""bersetuju dengan semua" hujah Guan Eng.

Menurutnya, walaupun pihaknya telah berhujah dan memberi penjelasan, namun Ketua Menteri gagal mendengarnya dan tetap dengan pandangan beliau.

Copyright © 1999-2012 Mkini Dotcom Sdn. Bhd
<http://www.malaysiakini.com/news/191532>